

U ovom broju, između ostalog, čitajte:

- **Potpisan novi Kolektivni ugovor za metalnu industriju FBiH i Kolektivni ugovor o izmjenama i dopunama Kolektivnog ugovora u oblasti cestovnog prometa FBiH**
- **Direktor UPFBiH sastao se sa novoimenovanim nacionalnim koordinatorom Međunarodne organizacije rada u BiH**
- **Potpisan Protokol kojim se olakšava dovođenje radne snage u BiH**
- **Održan sastanak predstavnika Coca-Cole HBC Adria i Udruženja poslodavaca u FBiH**
- **Ministarstvo komunalne privrede, KS ukinulo parafiskalni namet - naknadu za izdavanje dozvole za obavljanje energetske djelatnosti isporuke toplotne energije**



Potpisan novi Kolektivni ugovor za metalnu industriju FBiH: Satnica povećana na 6,15 KM

Udruženje poslodavaca u FBiH – Grupacija poslodavaca za djelatnost metalne industrije u FBiH i Sindikat metalaca FBiH potpisali su novi Kolektivni ugovor o pravima i obavezama poslodavaca i radnika za djelatnost proizvodnje i prerade metala u FBiH.

Ugovor su potpisali predsjednik Pregovaračkog tima Udruženja poslodavaca u FBiH/Grupacije poslodavaca za djelatnost metalne industrije u FBiH Elvedin Ćosatović i predsjednik Sindikata metalaca FBiH Almir Salihović.



Kolektivni ugovor utvrđuje prava i obaveze poslodavaca i radnika u pogledu pitanja iz radnog odnosa, plaća i naknada plaća, uslove rada sindikata, načina vođenja kolektivnih pregovora i rješavanja sporova, zaštite na radu te drugih pitanja od značaja za uređivanje odnosa između poslodavaca i radnika koja nisu ili nisu u cijelosti uređena Zakonom o radu i drugim propisima.

Izmjena se odnosi na povećanje najniže neto satnice – sa dosadašnjih 4,40 KM na 6,15 KM, što predstavlja značajan iskorak u zaštiti radničkih prava i unapređenju materijalnog položaja zaposlenih.



Ugovor predstavlja rezultat konstruktivnog dijaloga, međusobnog uvažavanja i zajedničke opredijeljenosti ka stabilnom i održivom uređivanju radnih odnosa u ovom važnom privrednom sektoru.

Ugovor stupa na snagu dan nakon objavljivanja u Službenim novinama FBiH.

[Kolektivni ugovor o pravima i obavezama poslodavaca i radnika za djelatnost proizvodnje i prerade metala u FBiH](#)

Potpisan Kolektivni ugovor o izmjenama i dopunama Kolektivnog ugovora u oblasti cestovnog prometa FBiH



Udruženje poslodavaca u Federaciji Bosne i Hercegovine – Grupacija poslodavaca za djelatnost

cestovnog prometa FBiH i Samostalni sindikat saobraćaja i veza u BiH, 19. augusta 2025. godine potpisali su Kolektivni ugovor o izmjenama i dopuni Kolektivnog ugovora o pravima i obavezama poslodavaca i radnika u oblasti cestovnog prometa za teritoriju FBiH.

Ovim izmjenama i dopunama Kolektivnog ugovora značajno je povećana najniža satnica sa 3,52 KM na 5,70 KM.

Kolektivni ugovor su potpisali predsjednik pregovaračkog ima UPFBiH/ Grupacija poslodavaca za djelatnost cestovnog prometa Nedžad Siočić i predsjednik Samostalnog sindikata saobraćaja i veza u BiH Benaris Dedić. Kolektivni ugovor stupa na snagu narednog dana od dana objavljivanja u Službenim novinama Federacije BiH, a primjena počinje 01. septembra 2025. godine, s rokom važenja od jedne godine.



Zaključivanje ovog ugovora rezultat je kontinuiranog i konstruktivnog socijalnog dijaloga između poslodavaca u FBiH i predstavnika granskih sindikata u realnom sektoru u FBiH kojim se pokazuje spremnost obje strane da zajedničkim djelovanjem unaprijede uslove rada i doprinesu stabilnosti i razvoju cestovnog prometa. Ovo je ujedno i važna poruka da samo kroz partnerstvo, razumijevanje i kompromis, možemo graditi održivo poslovno okruženje koje će koristiti i radnicima i poslodavcima, ali i društvu u cjelini.

Potpisivanjem ovog ugovora, Udruženje poslodavaca u FBiH i Savez samostalnih sindikata BiH putem svojih granskih organizacija, potpisali su i treći od ukupno sedam kolektivnih ugovora koliko je bilo potpisano prošle godine. Usaglašen je i Kolektivni ugovor za oblast tekstila, kože i obuće te predstoje razgovori s ciljem pregovora oko kolektivnih ugovora za oblast hemije i nemetala, građevine i trgovine.

[Kolektivni ugovor o izmjenama i dopuni Kolektivnog ugovora o pravima i obavezama poslodavaca i radnika u oblasti cestovnog prometa za teritoriju FBiH](#)

Direktor UPFBiH sastao se sa novoimenovanim nacionalnim koordinatorom Međunarodne organizacije rada u BiH



Povodom imenovanja Edisa Arifagića za nacionalnog koordinatora Međunarodne organizacije rada u BiH (ILO), 21. augusta 2025. godine je u službenim prostorijama Međunarodne organizacije rada, održan sastanak direktora Udruženja poslodavaca u FBiH Marija Nenadića i novoimenovanog predstavnika ILO u BiH.

Direktor Nenadić je čestitao Arifagiću imenovanje na ovu važnu funkciju i zahvalio se na dugogodišnjoj saradnji Udruženja poslodavaca u FBiH i ILO-a, te naglasio značaj mandata ILO za stabilne i međunarodnopravno utemeljene odnose ključnih konstituenata Međunarodne organizacije rada, a to su vlasti, reprezentativno udruženje poslodavaca i sindikat.

Tokom sastanka razgovaralo se o mogućnostima unapređenja saradnje Udruženja poslodavaca u FBiH i Međunarodne organizacije rada u odnosu na nadležnosti i mandate ovih organizacija. Posebno su dogovarane zajedničke aktivnosti na pripremi odgovarajućih propisa iz oblasti rada i zapošljavanja kojima se domaće zakonodavstvo usklađuje sa međunarodnim konvencijama, regionalnim i širim tržištima, a istovremeno prilagođava specifičnim pitanjima i potrebama u BiH.

Predstavnici ILO-a i Udruženja poslodavaca dogovorili su i pripremu konkretnih zajedničkih

projekata koji za cilj imaju poboljšanje stanja u oblasti rada, ali i pitanja vezano za radnu snagu, modernizaciju poslovnih procesa, zapošljavanja i ostalo.

Dogovoreni su konkretni koraci koje će ILO i Udruženje poslodavaca u FBiH poduzeti u narednom periodu kako bi se dugogodišnja uspješna saradnja u budućnosti nastavila i unaprijedila kroz mehanizme kontinuiranog dijaloga, koordiniranja vezanih aktivnosti i jače i direktnije uključivanje Udruženja poslodavaca u FBiH u pripremi i implementaciji projekata od važnosti za pitanja rada, zapošljavanja i slično.

Obavljena Uredba o izmjenama i dopunama Uredbe o isplati pomoći radnicima od strane poslodavaca i Uredba o izmjenama Uredbe o mjerama finansijske pomoći privatnim poslodavcima, obrtima i ostalim samostalnim djelatnostima u FBiH



U Službeni novinama FBiH 58/25 od 01.08.2025. godine objavljena je [Uredba o izmjenama i dopunama Uredbe o isplati pomoći radnicima od strane poslodavaca i Uredba o izmjenama Uredbe o mjerama finansijske pomoći privatnim poslodavcima, obrtima i ostalim samostalnim djelatnostima u FBiH.](#)

Potpisan Protokol kojim se olakšava dovođenje radne snage u BiH



Ministar vanjskih poslova BiH Elmedin Konaković i zamjenik direktora Službe za poslove sa strancima Almin Imamović 06. augusta 2025. godine potpisali su "Protokol o postupanju u postupcima po zahtjevima za odobrenje i produženje boravka podnijetim Službi za poslove sa strancima van BiH putem diplomatsko-konzularnih predstavništava BiH".

Protokol definiše proceduru podnošenja zahtjeva za odobrenje i produženje boravka izvan BiH putem diplomatsko - konzularnih predstavništava, čime se postupak značajno ubrzava i pojednostavljuje, posebno u kontekstu angažmana strane radne snage.

"Ovo je mali korak, ali značajan. Ubrzat ćemo dovođenje radne snage u Bosnu i Hercegovinu i na taj način pomoći ekonomiji BiH. Nadam se da je ovo prvi korak kojim se trasira izmjena našeg zakonodavstva. Vidjeli smo da ima previše administracije u dijelu kada strani radnici, prilikom angažovanja od poslodavca, dobijaju dozvole za dolazak u BiH i boravak u BiH, a onda pokreću procedure za dobijanje radnih dozvola. To dovodi ih dovodi u nepovoljnu situaciju, posebno poslodavce", kazao je Konaković.


Dodao je da su potpisivanjem Protokola napravili taj korak u kojem će se DKP mreži moći aplicirati za dobijanje radnih dozvola.

Naglasio je kako bi dobijanje potrebne dokumentacija sada trebalo biti lakše.

"Ovako olakšavamo ekonomiji i poslodavcima angažmane radnika. Bolje bi bilo, naravno, da imamo dovoljno radne snage u BiH, ali, nažalost, naše tržište nismo napravili dovoljno atraktivnim kako bismo zadržali mlade ljude ili ponukali da se vrate oni koji su otišli", istakao je Konaković.

Imamović je rekao da na ovom projektu rade već mjesecima, a da su ga konačno priveli kraju.


"Omogućili smo svim strancima da u diplomatsko-konzularnom predstavništvu mogu predati zahtjeve i tu smo uštedili dosta vremena. Ovo nije mala stvar, pokušavali smo i prije, ali smo sada konačno došli do toga da smo riješili", rekao je Imamović.



Član ESV-a FBiH delegacije poslodavaca Adnan Smailbegović istakao je da je ovo nešto na čemu Udruženje poslodavaca u FBiH radi već duže vrijeme.

"Zahvaljujući upornosti ministra Konakovića i zamjenika direktora Službe za poslove sa strancima Imamovića ovo će ubrzati i skratiti procedure za dovođenje stranih radnika. One danas traju od šest do deset mjeseci, a po našoj procjeni ovo će skratiti njihovu proceduru za dva do tri mjeseca što je značajan korak. Još uvijek su te procedure duge, još je dosta koraka pred nama, ali radit ćemo dalje sa ostalim institucijama kako bi procedure dodatno olakšali", kazao je Smailbegović.

**Ministarstvo komunalne privrede,
infrastrukture, prostornog uređenja, građenja i
zaštite okoliša KS ukinulo parafiskalni namet,
odnosno naknadu za izdavanje dozvole za
obavljanje energetske djelatnosti isporuke
toplotne energije**



Nakon dugogodišnjih inicijativa i zahtjeva Udruženja poslodavaca u Federaciji BiH za smanjenje i ukidanje parafiskalnih nameta, Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo izradilo je Pravilnik o izmjenama i dopunama Pravilnika o uslovima obavljanja energetske djelatnosti proizvodnje i isporuke toplotne energije, kojim se ukida naknada za izdavanje dozvole za obavljanje energetske djelatnosti isporuke toplotne energije.

Cilj donošenja izmjena ovog pravilnika je smanjenje administrativnog i finansijskog opterećenja pravnih lica koja se Ministarstvu obraćaju zahtjevom za izdavanje uvjerenja za obavljanje energetske djelatnosti proizvodnje i isporuke toplotne energije, kako bi poslovanje kod pružanja usluge korisnicima uskladili sa Zakonom o komunalnim djelatnostima.

Udruženje poslodavaca u FBiH pozdravlja ovu odluku i naglašava da je riječ o još jednom važnom koraku u pravcu rasterećenja privrede i stvaranja povoljnijeg poslovnog ambijenta.

Održan sastanak predstavnika Coca-Cole HBC Adria i Udruženja poslodavaca u FBiH



Sastanak predstavnika kompanije Coca-Cola HBC Adria i Udruženja poslodavaca u Federaciji BiH održan je 19. augusta 2025. godine, a istom su u ime Coca-Cole HBC Adria prisustvovali generalni direktor Dimitris Rompis, direktor Odjela za korporativne poslove i održivost Igor Zgrabljic, rukovoditeljica pravnih poslova Senada Merdžanović te menadžerica za javne i regulatorne poslove Zehra Gušić, a u ime UPFBiH direktor Mario Nenadić, zamjenika predsjednika UO Mujo Hasić i predsjednik Udruženja poslodavaca KS Suhad Ećo.

Povod sastanka bio je upoznavanje sa novim generalnim direktorom Coca-Cole HBC Adria te razgovor o mogućnostima daljeg unapređenja saradnje.

Predstavnici Udruženja poslodavaca predstavili su strukturu udruženja, način organiziranja, kao i aktuelne projekte i prioritete na kojima Udruženje trenutno radi, a obje strane su izrazile zadovoljstvo zbog spremnosti na zajednički rad na inicijativama koje doprinose razvoju poslovne zajednice i ekonomije u BiH. Generalni direktor Coca-Cole HBC Adria stavio je na raspolaganje predstavnicima Udruženja kapacitete i iskustvo u poslovanju koje Coca-Cola može ponuditi kao velika organizacija u globalnim svjetskim okvirima.

Sastanak je ocijenjen veoma korisnim, potvrđena je zajednička opredijeljenost Coca-Cole HBC Adria i Udruženja poslodavaca u FBiH da kroz partnerstvo, dijalog i zajedničke inicijative grade stabilnije i konkurentnije poslovno okruženje.



UDRUŽENJE POSLODAVACA

UDRUŽENJE POSLODAVACA U FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba